

16. oktober 2013

UKA 2013/78  
Ruth Heilmann

**Atuarfik pillugu Inatsisartut inatsisaat nr. 15, 3. december 2012-imeersumi § 25, imm. 4-imi aamma § 36, imm. 1-imi aalajangersarneqartut naapertorlugit meeqqanut inuusuttunullu inerikkiartormikkut kingusissunut nerisaqarfigiutigalugu atuarfit-tut immikkut ilusiligaasumik suli ataatsimik pilersitseqqullugit ingerlatseqqullugillu Naalackersuisut peqquneqarnissaannik Inatsisartut aalajangiiffigisassaattut siun-nersuut.**

(Inatsisartunut ilaasortaq Agathe Fontain, Inuit Ataqatigiit)

Taamatut Inatsisartuni ilaasortaq Agathe Fontain Inuit Ataqatigiit siunnersuuteqarnera Si-umumit qujassutigaarput.

Aallaqqaammut Siumumi anguniakkatsinnit imatut allassimasumik tigulaarissaanga. "In-narluuteqartut ilinniarfiisa nukittorsarneqarnissaat, aammalu Innarluuteqartut ilinniarfinnut iserniarnerminni aporfeqannginnissaat aqutissiuuteqataaffigissallugu. ADHD-rtunut aammalu assigisaanik pisariaqartitsineq naapertorlugu ilinniartitaanikkut aqutissat anner-tusarne-qarnissaannut sulissuteqarnissaq, kiisalu Innarluuteqartut ilinniarsinnaanerit periarfissaareersut soorlu Ado Lyngep Atuarfiata ilinniartuuteqarsinnaanerata annertusaa-vigineqarnissaa."

Taamaattumik manna siunnersuut qaqqinneqartoq Siumumit assut soqutigintartut isu-maqarfigaarput sukumiisumillu nalilersuiffigineqarnissaa pisariaqartutut isumaqarfigaarput.

1.oktober 2013 konto 40.10.11-mut tunngatillugu Aningaasaqarnermut ataatsimiititaliap Naalackersuisumit akissutisiaani allaqqavoq Ado Lyngep atuarfiani ukiut tamaasa inissat tamarmik atorineqartut. Ukioq mannalugu atuartoq ataaseq utaqqisut allattorsimaffiani allaq-qatinneqartoq.

Kisianni aamma nalunngilarput suli ullumikkut arlaqarmata qallunaat nunaannut ingerlatin-neqartariaqartartut, Siumumiillu isumaqarpugut nunatsinni periarfissaqarnissaat sulissutis-sat aamma eqqarsaatigisassanut ilaalluinnartariaqartoq.

Siumumit nalunngilarput Ado Lyngep atuarfia 1982-imit tamakkiisumik pisariaqartinneqar-nini naapertorlugu inuiaqatigiinni iluaqutaasumik ingerlatinneqartoq aammalu siunissami atuarfik taamatut ittoq pisariaqartinneqartuassasoq.

Kommunit Ado Lyngep atuarfianik atuisuupput sulisunillu oqaatigineqartarpoq siusinaar-tumik atuartut tigugaangamikkik soorlu 15-nik ukiullit ilaanni 21-nik ukioqalernissamik tungaanut Ado Lyngep atuarfianiissinnaasartut ajunngitsumillu angusaqarfigalugu. Aam-malu ilaqartartut atuarfimiinnerminnik ineriartorfikuminaatsitsisunik tamannalu erseraan-gat taakkua angerlartiinnarneqartarsimasut soorlu siorna marluk taamatut inissisimasut angerlartiinnarneqarsimapput.

Ado Lyngep atuarfianut paasisassarsiortarnitsinni sulisut anersaaruluutaannut ilaasarpoq Ado Lyngemi atuartut atuarnertik naammassisimallugu angerlaraqata qanoq ingerlaqqit-tarnerannik tamakkiisumik malittarinnissinnaajunnaartarnertik uggoralugu. Tusartakkatillu malillugit atuartuutaasa ilaat angerlaraqamik najukkaminnut nunaqarfinnut illoqarfinnulluunniit unittoortarsimapput, ataasiakkaalli tusartarpaat ingerlalluartut tassalu suliffeqarfinni ullup affaani sulisitaasartut soorlu meeqqerivinni utoqqaallu illuini, soorunami aamma ingerlallualersimasunik ilaqartarput ilaat aappaqalertarlutik qitornaqalerlutilluunniit.

Ullumikkut killiffigisatsinni malunnarluarpoq Ado Lyngep atuarfianeereersut eqqarsaatigalugit aammalu qularnanngitsumik taamaaqataannik killiffeqartut eqqarsaatigalugit ingerlariaqiffissamik innarluutilinnut atuarfimmik assigiinngitsutigut amigaateqartoqartoq, aamma 20-t qaangerlugit ukiulinnut. Tamannalu Nunatsinni Innarluutillit Kattuffiata piumasarisaa ilaasartoq ilisimavarput.

Nalunngilarputtaaq arlaqartut nunatsinni efterskolimi siornali periarfissitaanikuusut aammalu qallunaat nunaanni imaluunniit Knud Rasmussenip højskoliani periarfissamik ammatitsisoqartoq. Paaserusunnaarporlu taakkua periarfissiissutaasimasut qanoq ullumikkut atorluarneqartiginersut?

Siumumiit isumaqarpugut nunatsinni atuarfimmik nutaamik imaluunniit innarluuteqartunut ilinniarfimmik pilersitsisinnaanermik isuma soqutiginaruusoq taamaattumik kommunini atuisut peqatigalugit, Kanukoka IPIS-i Najugaqarfik Elisibannguaq, Angerlarsimaffik Palleq, Ivaaraq, Tungujortuaraq minnerunngitsumik aamma Ado Lyngemi sulisut ilami ukiorpanni taakkunani sulisooreersimammata ilisimasaat misilittagaallu atorluarlugit nalilersueqatigineqartariaqartut.

Aqagu siunissamilu qanoruna iliorniartugut innarluutilinnut nutaamik atuarfiliortoqassanersoq imaluunniit Ado Lyngep atuarfia annertusarneqassanersoq imaluunniit allatut pioreersulluunniit atorluarlugit takorluuisoqarnersoq siunnersuummut ilaatillugu nalilersorluagasasutut isigaarput.

Timikkut aammalu eqqarsartaatsikkut innarluuteqartunut ullumikkut sullissinitsinni killiffi-  
usoq annertuumik oqaluuserisaralugulu nalilersuiffigineqaaqqaartariaqartoq isumaqaratta  
nutaamik pilersitsinngilaattaani.

Taamatut Siumumit oqaaseqarluta siunnersuut Kultureqarnermut, Ilinniartitaanermut Ilimatusarnermut Ilageeqarnermullu Ataatsimiititaliami suliarineqarnissaa nalilersuiffigineqar-  
nissaalu innersuussutigaarput.